

आकाशवाणी

खास-खास खबरां:-

1. सरकारै आखेआ ऐ जे भारत- पेट्रोल ते डीजल दे उत्पादन च आत्मनिर्भर ऐ ते देशै दिआं रिफाईनरियां अपनी पूरी समर्थ दे कन्नै कम्म करा करदिआं न।
2. अमरीकी राष्ट्रपति डॉनल्ड ट्रम्प होरें आखेआ ऐ जे ईरान दी महत्वकांक्षा पूरे पच्छिम एशिया पर अपना दबदबा बनाने ते इजराईल गी तबाह करने दी ही-पर हुन ओहिदिआं एह योजनां खत्म होई गेदिआं न।
3. प्रधानमंत्री नरेन्द्र मोदी होर अज्ज कोलकाता च लगभग 18 ज्हार 680 करोड़ रुपें दी केंई विकास परियोजनाएं दा उदघाटन ते नीह पत्थर करगंन।
4. संसद च बरोधी धड़े दे सदस्यें दौनें सदनें गी नोटिस देइयै मुख चुनां आयुक्त ज्ञानेश कुमार होरें औहद्धे शा हटाने दी मंग कीती ऐ।
5. मयंक चक्रबर्ती- असम थमां पैहले ते भारत दे 94में.वे शतरंज ग्रैंडमास्टर बनी गे न।
6. महिलाएं दे एफ.आई.एच हॉकी विश्व कप च भारत ने कल हैदराबाद च इटली गी 1-सिफर कन्नै हराइयै फाईनल च अपनी थाहर पक्की करी लैती ऐ।

<><><><><><>

Govt. Briefing West Asia

भारत नै पच्छिम एशिया दे मौजूदा हालात गी ध्यानै च रक्खदे होई ईरान थमां ऊर्जा ते माल समेयान दे निर्विघ्न आओ-जाई गी यकीनी बनाने दे महत्वै पर लौ पाई। नमीं दिल्ली च कल पच्छिम एशिया च हाल दे घटनाक्रम पर अंतर

मंत्रालय संवाददाता सम्मेलन च विदेश मंत्रालय दे प्रवक्ता रंधीर जयसवाल होंरें आखेया जे प्रधानमंत्री नरेन्द्र मोदी होंरें वीरवारें ईरान दे राष्ट्रपति मसूद पेजेशकियन हुंदे कन्नै गल्लबात च ईरान समेत इस इलाके च भारतीय नागरिकें दी सुरक्षा गी लेइयै भारत दी प्राथमिकताएं पर जोर दिता। समुन्द्री यातायात दे विशेष सचिव राजेश कुमार सिन्हा होंरें दसेया जे होरमूज जल डमरु मध्य दे पच्छम च भारतीय झंडे आले 24 जहाज मौजूद न। उ'नें दस्सेया जे होरमूज जल डमरु मध्य दे पूर्वज भारतीय झंडे आले 3 जहार मौजूद न। पेट्रोल ते कुदरती गैस मंत्रालय दी संयुक्त सचिव सुजाता शर्मा होंरें दसेया जे भारत पेट्रोल ते डीजल उत्पादन च आत्मनिर्भर ऐ ते तेल साफ करने आले सारे कारखानें अपनी पूरी छमता कन्नै कम्म करा' रदे न ते कच्चे तेल दा बी मुल्खा च सुद्धा भंडार मौजूद ऐ। उ'नें अग्गे दसेया जे घरेलू रसोई गैस- एल.पी.जी. ते गड्डियें लेई CNG दी दस्तयाबी बिजन कुसै कटौती दे चलै करदी ऐ। उ'नें इब्बी दस्सेया जे एल.पी.जी सप्लायरें कश बी एदी कोई कमी नैई ऐ ते हर रोज 50 लक्ख कोला मते सिलेंडर बंडे जा करदे न। तोंआई सूचना ते प्रसारण मंत्रालय दे संयुक्त सचिव सैथिल राजन होंरें लोकें अग्गे अपील कीती ऐ जे ओ गैस सिलेंडरें दी बुकिंग अधिकारिक माध्यमें राएं गै करान ते ऑनलाईन ठगी दा शिकार नैई बनन।

<><><><><><>

US-Iran

अमरीका दे राष्ट्रपति डोनाल्ड ट्रम्प होंरें आखेया जे ईरान दी मंशा पूरे पच्छमी एशिया पर अपना प्रभुत्व कायम करना ते इजरायल गी तबाह करना ही- पर हुन ओदें सारें मनसूबें खत्म होई चुके देन। इक सोशल मीडिया पोस्ट च ट्रम्प होंरें आखेया जे अमरीकी केन्द्रीय कमान नै ईरान दे खारग टॉपू पर फौजी ठिकाने पर इक बड़ा बम्बारी अभियान चलाया ऐ। उ'नें इस अभियान च टॉपू च मौजूद हर फौजी ठिकाने गी पूरी चाली तबाह करने दा दावा बी कीता। ट्रम्प होंरें अगगे आखेया जे इस इलाके दे इतिहास च सब्बनें शा तगड़ी बम्बारी चा इक एह अभियान इक हा। उ'नें आखेया जे अमरीका नै जानी बुज्झियै इस टॉपू पर मौजूद तेल आले ठिकाने गी निशाना नैई बनाया। इस्सै दौरान अमरीका नै पच्छिम एशिया च ढाई जहार मरीन सैनिक ते इक युद्ध पोत भेजने दा हुकम दिता ऐ। तोंआई तेहरान च जहारां बद्धे लोकें दी फिलिस्तीनियें दे समर्थन च आयोजित सलाना रैली दे दौरान इक जबरदस्त धमाका होआ। इजरायल ने मध्य तेहरान दे इस इलाके गी निशाना बनाने दी पैहले गै चेतावनी जारी करी दिती ही। ईराना नै इजरायल ते गोआंडी खाड़ी मुखें पर मिसाइल ते ड्रोन राएं उप्परोतली हमलें जारी रक्खे दे न। उन्नै होरमूज जल डमरु मध्य गी बी बंद करी दिते दा ऐ- जेदे रस्तेया दुनिया दा 20 प्रतिशत तेल दा कारोबार हुंदा ऐ।

<><><><><><>

PM- Kolkata Visit

प्रधानमंत्री नरेन्द्र मोदी होर अज्ज कोलकाता च लगभग 18 जहार 680 करोड़ रुपें दी केंई विकास परियोजनाएं दा उदघाटन ते नीह पत्थर रक्खगंन। प्रधानमंत्री

होर कोई 16 जहार 990 करोड़ रपे दी लागत आहली 420 किलोमीटर लम्मी
केंई राष्ट्रीय जरनैली सड़क परियोजनाएं दा बी उदघाटन करगंन। इनें
परियोजनाएं च पच्छम बंगला ते झारखंड च राष्ट्रीय जरनैली सड़क एन.एच-19
ते पच्छम बंगाल च राष्ट्रीय जरनैली सड़क एन.एच-114 दे हिस्से शामिल न।
इनें परियोजनाएं कन्नै सड़क सुरक्षा सुधार- सफर च लग्गने आहली समें च
कमी- गड़डियें दे रश दे प्रदूषण च कमी- इलाकाई सड़क राबते च सुधार-
सैलसफा गी बढ़ावा ते इलाके च आर्थिक विकास गी रफतार थहोने दी मेद ऐ।
प्रधानमंत्री केंई राष्ट्रीय जरनैली सड़क परियोजनाएं दा नीह पत्खर बी रखगंन-
जिंदे च 231 किलोमीटर लम्मी दे कन्नो-कन्नी 4 गड़डियें दे लंघने जोग-
खड़गपुर मोरग्राम आर्थिक गलियारे दे 5 खड शामिल न। एह परियोजना खड़गपुर
ते सिलीगुड़ी बश्कार बनाए गेदे आर्थिक गलयारें दा हिस्सा ऐ ते पच्छम बंगाल
दे पच्छमी मेदिनी पुर- बांकुडा हुगली- पूर्वी वर्धमान- वीरभूम ते मुर्शिदाबाद जिले
थमां होइया लंगगग। सड़क परियोजनाएं दे इलावा मोदी हुंदा केंई जल ट्रांसपोर्ट
सरबंधि पत्तन ते पोर परिवहन सरबंधि परियोजनाएं दा बी शिलान्यास ते
लोकपर्ण करगंन।

<><><><><><>

Parliament -CEC

तृणमूल कांग्रेस सनें विपक्ष दे केंई सांसदे मुख चुनां आयुक्त ज्ञानेश कुमार गी
पद शा हटाने लेई संसद दे दवे सदनें च प्रस्ताव आहनने दी मंग करदे होई

नोटिस दिता ऐ। सूत्रे मुजब लोकसभा ते राज्यसभा सचिवालय इने नोटिसे दे खाके दी जांच करगंन।

इस मामले च प्रतिक्रिया दिंदे होई केन्द्रीय मंत्री एस.पी. सिंह बघेल होरे आखेआ जे तृणमूल कांग्रेस आसेआ दिता गेआ एह नोटिस दर्शादा ऐ जे उ'नेगी संवैधानिक संस्थाएं ते लोकतंत्र पर भरोसा नई ऐ। नमीं दिल्ली च पत्रकारे कन्नै गल्लबात करदे होई उ'ने विपक्ष पर संवैधानिक संस्थाएं दी छवि खराब करने दा आरोप लाया। तोंआई तृणमूल कांग्रेस दे सांसद सौगात राय होरे आखेआ जे उ'दी पार्टी आसेयआ दिता गया नोटिस कनून दे मुताबिक ऐ। उ'ने आरोप लाया जे पच्छिम बंगाल च बिशेश नज़रसानी आहली प्रक्रिया दे दौरान मतदाता सूची शा केई मतदाताएं दे नां हटाई दिते गे न- जेहड़ा सेही नई ऐ।

<><><><><><>

Yuva Sangam

युवा संगम दे 6में गेड़ आस्तै पंजीकरण शुरु होई गे न। शिक्षा मंत्रालय “एक भारत- श्रेष्ठ भारत” पैहलकदमी दे तैहत देश भरै दे युवाएं गी इस कार्यक्रम च हिस्सा लैने लेई साद्दा देआ'रदा ऐ। पंजीकरण दी अखीरली तरीख 18 मार्च ऐ। पंजीकरण वेबसाईट ebsb.aicte.india.org पर जाइयै कीता जाई सकदा ऐ। एह कार्यक्रम युवाएं गी बक्ख-बक्ख राज्ये ते केन्द्र शासित प्रदेशे दी यात्रा दे राएं भारत दी समृद्ध सांस्कृतिक विरासत- परम्पराएं ते नवाचार तंत्र गी कोला जानने ते अनुभव करने दा मौका दिंदा ऐ।

<><><><><><>

Raipur- Aadi Parab Festival

छतीसगढ़ दे रायपुर च “आदिपर्व” महोत्सव कल्लै थमां शुरु होई गया ऐ। जनजातीय समाज दे इस दंडु दिने दे उत्सव च छतीसगढ़ सनें तेलंगाना-ओडिशा- महाराष्ट्र ते झारखंड दे अदिवासी लोक कलाकार शामिल ऐ। इस बरे “आदिपर्व” महोत्सव दा विषय ऐ परम्परा थमां पच्छिम तगर। महोत्सव दा उद्देश्य छतीसगढ़ दी सगगोसार जनजातीय संस्कृति कला ते परम्पराएं लेई मंच प्रदान करना ऐ। अज्ज इस महोत्सव दा खीरी ध्याड़ा ऐ।

<><><><><><>

Goyal –NXT Summit

केन्द्रीय बंज-बपार ते उद्योग मंत्री पीयूष गोयल होरें आखेआ ऐ जे भारत निवेश- विनिर्माण ते वैश्विक बजारे च अपनी हिस्सेदारी बधाने गी इक आकर्षक थहार बनदी जा’रदी ऐ। एन.एक्स.टी समिट गी सम्बोधित करदे होई गोयल होरें इस गल्ल पर जोर दिता जे हाल दे केई सालें च भारत आसेया सम्पन्न मुक्त बपार समझौते नमें निवेश दे भित्त खोला करदे न- विनिर्माण दे मौके दा विस्तार करा’रदे न ते नवाचार आधारित विकास गी बढ़ावा देआ करदे न। उ’नें एह बी आखेआ जे सरकार- अनुपालन च कमी ते केई प्रावधानें दे अपराध-मुक्तिकरण जनेह कदमें दे राएं कारोबार करने च सुगमता बधाने आस्तै लगातार जतन करा’रदी ऐ।

<><><><><><>

बरखा बरी सकदी ऐ। गुजरात- पच्छमी हिमालय दे देश दे पूर्वी हिस्सें च
तापमान च 2 कोला 4 डिग्री दा बाददा होई सकदा ऐ।

<><><><><><>